



Broj: 03/10-50-18-43-21/20
Sarajevo, 16.10.2020.

Istraživanje broj: 325

Vrsta istraživanja: INF

SUSPENZIJA NOSIOCA PRAVOSUDNE FUNKCIJE U CRNOJ GORI, HRVATSKOJ, SRBIJI I SLOVENIJI

Pripremila:
Nihada Jeleč

Deskriptor: nosioci pravosudnih funkcija

Istraživanje je namijenjeno poslanicima i delegatima, koji mogu postaviti dodatna pitanja, sugestije i komentare na email adresu: istrazivacki.sektor@parlament.ba.

Javnost Bosne i Hercegovine može komentirati radove, ali Istraživački sektor nema mogućnost da odgovara na komentare i diskutira o istraživanju.

Informacije navedene u sadržaju istraživanja važeće su u trenutku pripreme istraživanja i one se ne ažuriraju nakon objave istraživanja.

Istraživanje ne odražava zvaničan stav Parlamentarne skupštine Bosne i Hercegovine (PSBiH).

Sadržaj

I. Uvod	3
II. Crna Gora	3
III. Hrvatska	4
IV. Slovenija	7
V. Srbija	9
V. Izvori informacija	10

SUSPENZIJA NOSIOCA PRAVOSUDNE FUNKCIJE U CRNOJ GORI, HRVATSKOJ, SRBIJI I SLOVENIJI

I. Uvod

U fokusu ovog istraživanja je tretman nosioca pravosudne funkcije za vrijeme suspenzije - privremenog udaljenja od/s dužnosti kako se naziva u Crnoj Gori, Hrvatskoj i Sloveniji, odnosno privremenog udaljenja s funkcije kako je definirano u Srbiji. Rad je pripremljen na zahtjev ovlaštenog naručioca.

Privremenim udaljenjem sudija odnosno tužilac ne gubi funkciju, ali za vrijeme suspenzije ne može obavljati poslove suđenja odnosno tužilačke poslove. S tim u vezi, u Hrvatskoj je propisano da sudija/zamjenik državnog odvjetnika (tužioca) ima pravo na jednu polovinu plate za vrijeme udaljenja s dužnosti. Istu visinu naknade plate suspendovani sudija i tužilac ima i u Sloveniji (osim ako je u pritvoru). Međutim, mogućnost smanjenja plate sudije odnosno tužioca za vrijeme privremenog udaljenja s funkcije nismo pronašli u propisima Crne Gore i Srbije.

Nadalje, u Sloveniji i Srbiji s funkcije mogu biti udaljeni sudije i državni tužioc, uključujući i generalnog odnosno republičkog državnog tužioca. S druge strane, privremeno udaljenje nije propisano za vrhovnog državnog tužioca u Crnoj Gori odnosno glavnog državnog odvjetnika i državne odvjetnike u Hrvatskoj. Zakonom su jasno definirani uvjeti i postupak za njihovo imenovanje i razrješenje.

II. Crna Gora

Privremeno udaljenje od dužnosti nosilaca pravosudnih funkcija u Crnoj Gori je uređeno Zakonom o sudskom savjetu i sudijama (udaljenje sudije) i Zakonom o državnom tužilaštvu (udaljenje državnog tužioca). Ova mjera se izriče u slučaju kad je sudiji odnosno državnom tužiocu određen pritvor, dok pritvor traje ili ako se protiv njega pokrene krivični postupak za djelo koje ga čini nedostojnim za vršenje funkcije. Privremeno udaljenje nije predviđeno za vrhovnog državnog tužioca. Zakonom je propisano njegovo imenovanje i razrješenje.

Crnogorski zakoni ne propisuju umanjenje plate u slučaju privremenog udaljenja od dužnosti nosilaca pravosudnih funkcija. Detaljnije odredbe o uvjetima i postupku udaljenja od dužnosti sudije/državnog tužioca, njegova prava za vrijeme suspenzije u Crnoj Gori nalaze se u nastavku rada.

Udaljenje sudije

[Zakon o sudskom savjetu i sudijama](#)¹ u članu 121. propisuje da će sudija biti privremeno udaljen od dužnosti, ako se:

- 1) protiv njega odredi pritvor, dok pritvor traje; ili
- 2) protiv njega pokrene krivični postupak za djelo koje ga čini nedostojnim za vršenje sudijske funkcije.

¹ "Sl. list CG", br. 11/2015, 28/2015 i 42/2018

Sudija može biti privremeno udaljen od dužnosti nakon podnošenja prijedloga za pokretanje disciplinskog postupka zbog najtežeg disciplinskog prekršaja. Odluku o privremenom udaljenju od dužnosti donosi Sudski savjet. Zahtjev za privremeno udaljenje podnosi disciplinski tužilac.

Radnje koje je sudija preduzeo povodom suđenja u pravnim stvarima poslije dana kad je udaljen, razriješen ili mu je prestala sudijska funkcija, ne proizvode pravno dejstvo prema članu 122. ovog zakona.

Ako je odbijen prijedlog za utvrđivanje disciplinske odgovornosti, troškove disciplinskog postupka snosi Sudski savjet, kako je definirano članom 123. Zakona o sudskom savjetu i sudijama

Udaljenje državnog tužioca

Privremeno udaljenje državnog tužioca uređeno je [Zakonom o državnom tužilaštvu](#)². Prema članu 121. ovog zakona državni tužilac će biti privremeno udaljen od dužnosti ako se:

- 1) protiv njega odredi pritvor, dok pritvor traje; ili
- 2) protiv njega pokrene krivični postupak za djelo koje ga čini nedostojnim za vršenje tužilačke funkcije. Državni tužilac može biti privremeno udaljen od dužnosti nakon podnošenja prijedloga za pokretanje disciplinskog postupka zbog najtežeg disciplinskog prekršaja. Odluku o privremenom udaljenju od dužnosti donosi Tužilački savjet. Zahtjev za privremeno udaljenje podnosi disciplinski tužilac.

Radnje koje je državni tužilac preduzeo u predmetima poslije dana kad je udaljen, razriješen ili mu je prestala tužilačka funkcija, u skladu s članom 122. ovog zakona, ne proizvode pravno dejstvo.

Ako je odbijen prijedlog za utvrđivanje disciplinske odgovornosti, troškove disciplinskog postupka snosi Tužilački savjet, navedeno je u članu 123. Zakona o državnom tužilaštvu.

III. Hrvatska

Udaljenje od obavljanja dužnosti nosilaca pravosudnih funkcija u Hrvatskoj je propisano Zakonom o Državnom sudbenom vijeću (udaljenje sudija) i Zakonom o Državnoodvjetničkom vijeću (zamjenika državnih odvjetnika/tužilaca). Zakonom je definirano imenovanje i razrješenje glavnog državnog odvjetnika, ali nije predviđena njegova disciplinska odgovornost niti suspendizija odnosno udaljenje od obavljanja dužnosti.

Važeći propisi definiraju slučajeve kad je udaljenje od obavljanja dužnosti sudije odnosno zamjenika tužioca obavezno (pokrenut krivični postupak, određen pritvor itd.) i slučajeve kada je udaljenje moguće. Odluka o udaljenju mora biti u pisanom obliku i obrazložena, a za vrijeme udaljenja nosilac pravosudne funkcije ima pravo na jednu polovinu plaće. Važno je naglasiti da udaljenjem nosilac pravosudne funkcije ne gubi dužnost, već i dalje ostaje sudija odnosno zamjenik tužilac, ali ne može obavljati poslove suđenja odnosno tužilačke poslove.

² Zakon o Državnom tužilaštvu ("Sl. list CG", br. 11/2015, 42/2015, 80/2017 i 10/2018)

Udaljenje sudije od obavljanja dužnosti u hrvatskom zakonodavstvu objasnila je grupa autora u Zborniku Pravnog fakulteta u Rijeci na sljedeći način: „Temeljne karakteristike ovog instituta su legalitet, privremeno trajanje, represivnost, preventivnost i akcesornost. *Legalitet* znači da sudac može biti udaljen od dužnosti samo u slučajevima određenim zakonom; *privremenost* da udaljenje od dužnosti može trajati najduže do donošenja pravomoćne odluke u stegovnom i/ili kaznenom postupku; *represivnost* se iskazuje u zadiranju u profesionalni položaj, ugled i materijalno stanje suca; *preventivnost* ukazuje na zaštitni karakter ove mjere kojom se štiti interes sudbene vlasti; a *akcesornost* je posljedica svrhe ovog instituta, jer udaljenje od dužnosti uvijek prati neko stanje stvoreno protupravnim ponašanjem suca koje se utvrđuje u posebnom stegovnom ili kaznenom postupku.“³

Udaljenje sudije

Prema članu 73. st. (1) [Zakona o Državnom sudbenom vijeću](#) sudac će biti udaljen s dužnosti:

- ako je protiv njega pokrenut kazneni postupak zbog kaznenog djela za koje je predviđena kazna zatvora od pet godina ili teža kazna, ili dok se nalazi u pritvoru,
- zbog osude za kazneno djelo koje ga čini nedostojnim obavljanja sudačke dužnosti ili
- zbog počinjenoga teškoga stegovnog (*disciplinskog*) djela.

Isti član ovog zakona u stavu (2) propisuje da sudac **može** biti udaljen s dužnosti:

- ako je protiv njega pokrenut kazneni postupak zbog kaznenog djela za koje je predviđena kazna zatvora do pet godina,
- ako obavlja službu, posao ili aktivnost koji su nespojivi s obavljanjem sudačke dužnosti,
- ako je ovlaštenu predlagatelj u zahtjevu za pokretanje stegovnog postupka predložio izricanje stegovne kazne razrješenja od dužnosti.

Zahtjev za udaljenje s dužnosti Državnom sudbenom vijeću podnosi predsjednik suda u kojem sudac obnaša sudačku dužnost, predsjednik neposredno višeg suda, nadležno sudačko vijeće ili predsjednik Vrhovnog suda Republike Hrvatske. Odluku o *obaveznom* udaljenju s dužnosti (stav 1. ovoga člana) donosi predsjednik suda, a u slučajevima iz stava 2. ovoga člana odluku donosi Državno sudbeno vijeće bez odgode. (*Član 73. st. (3) i (4) Zakona o Državnom sudbenom vijeću*)

Odluka o privremenom udaljenju mora biti u pisanom obliku i s obrazloženjem. Sudac nema pravo žalbe protiv ove odluke, ali ima pravo pokrenuti upravni spor, kako je navedeno u članu 74. ovog zakona.

Trajanje privremenog udaljenja, pravo na dio plate i pravo na isplatu razlike neisplaćene plate u slučaju oslobađajuće odluke ili kada je izrečena disciplinska mjera novčane kazne ili ukora propisani su članom 75. Zakona o Državnom sudbenom vijeću na sljedeći način:

- *Trajanje privremenog udaljenja* - Privremeno udaljenje od obavljanja dužnosti određuje se na rok od tri mjeseca, po proteku tog roka može ga Državno sudbeno vijeće iz opravdanih razloga na jednak način produljiti za daljnja tri mjeseca. Privremeno udaljenje može trajati do pravomoćnog okončanja stegovnog postupka, koji u tom slučaju Vijeće mora provesti u roku od godinu dana.

³ „Kaznena i stegovna (disciplinska) odgovornost sudaca“, autori: Mijo Galiot, Silvio Čović, dr. sc. Damir Juras, str. 887, Zbornik Pravnog fakulteta Sveučilišta u Rijeci, Vol. 34 No. 2, 2013.

- *Pravo na dio plate* - Za vrijeme privremenog udaljenja s dužnosti sudac ima pravo **na jednu polovinu plaće**.
- *Pravo na isplatu razlike neisplaćene plaće* - U slučaju oslobađajuće odluke u stegovnom postupku odluka o privremenom udaljenju prestaje po sili zakona danom pravomoćnosti odluke Vijeća. U tom slučaju ili u slučaju da je izrečena stegovna mjera novčane kazne ili ukora, sudac ima pravo na isplatu razlike neisplaćene plaće za vrijeme trajanja posljedica odluke o udaljenju od obavljanja dužnosti.

Udaljenje zamjenika državnog odvjetnika

U Hrvatskoj se tužiocima nazivaju državnim odvjetnicima i zamjenicima državnog odvjetnika. [Zakonom o državnom odvjetništvu](#) definirano je da je za cijelo područje države ustanovljeno Državno odvjetništvo, a također su uspostavljena županijska i općinska državna odvjetništva. Na čelu Državnog odvjetništva Republike Hrvatske je *glavni* državni odvjetnik.

Isti zakon propisuje da državni odvjetnik obavlja poslove državnoodvjetničke uprave i poslove iz nadležnosti državnog odvjetništva, predstavlja državno odvjetništvo, odgovara za rad državnog odvjetništva i upravlja državnim odvjetništvom.

U državnom odvjetništvu imenuju se *jedan ili više zamjenika državnog odvjetnika*, koji se zadužuju pojedinim predmetima na način kojim se osigurava nepristrana i nezavisna dodjela predmeta. Zamjenik državnog odvjetnika odgovoran je za rad u predmetu koji mu je dodijeljen i ovlašten je poduzimati sve radnje na koje je po zakonu ovlašten državni odvjetnik.

Disciplinska odgovornost, disciplinski postupak, disciplinske sankcije te suspenzija u Hrvatskoj nisu propisani za glavnog državnog odvjetnika i državne odvjetnike, već za zamjenike državnog odvjetnika.

[Zakon o Državnoodvjetničkom vijeću](#) u članu 97. propisuje da će zamjenik državnog odvjetnika biti privremeno udaljen od dužnosti:

- ako je protiv njega pokrenut kazneni postupak zbog kaznenog djela za koje je predviđena kazna zatvora od pet godina ili teža kazna ili dok se nalazi u istražnom zatvoru,
- zbog osude za kazneno djelo koje ga čini nedostojnim obavljanja državnoodvjetničke dužnosti. (*Čl. 97. st. 1.*)

Zamjenik državnog odvjetnika **može** biti privremeno udaljen od dužnosti:

- ako je protiv njega pokrenut kazneni postupak zbog kaznenog djela za koje je predviđena kazna zatvora do pet godina;
- ako obavlja službu, posao ili aktivnost koji su nespojivi s obavljanjem Državnoodvjetničke dužnosti bez prethodnog pisanog odobrenja Vijeća;
- ako ovlašteni predlagatelj predloži stegovnu kaznu razrješenja;
- ako ovlašteni podnositelj zahtjeva za pokretanje stegovnog postupka predloži privremenu mjeru udaljenja. (*Čl. 97. st. 2.*)

Odluku o privremenom udaljenju od dužnosti zamjenika državnog odvjetnika donosi glavni državni odvjetnik Republike Hrvatske u slučaju kad je protiv zamjenika državnog odvjetnika pokrenut krivični postupak zbog krivičnog djela za koje je predviđena kazna zatvora od pet godina ili teža kazna ili dok se nalazi u istražnom zatvoru, i u slučaju presude za krivično djelo koje ga čini nedostojnim obavljanja državnoodvjetničke dužnosti.

O privremenom udaljenju od dužnosti zamjenika državnog odvjetnika odlučuje Državnoodvjetničko vijeće u sastavu od tri člana u slučajevima iz stava 2. člana 97.

Trajanje privremenog udaljenja zamjenika državnog odvjetnika, njegovo pravo na dio plate i pravo na isplatu razlike neisplaćene plate definirani su članom 98. Zakona o Državnoodvjetničkom vijeću na sljedeći način:

- *Trajanje privremenog udaljenja* - Privremeno udaljenje od obavljanja dužnosti određuje se na rok od tri mjeseca, a nakon isteka toga roka može ga Vijeće iz opravdanih razloga na jednak način produžiti za daljnja tri mjeseca. Privremeno udaljenje može trajati do pravomoćnog okončanja stegovnog postupka, koji u tom slučaju Vijeće mora provesti u roku od godinu dana.
- *Pravo na dio plate* - Za vrijeme privremenog udaljenja od dužnosti zamjenik državnog odvjetnika ima **pravo na jednu polovinu plaće**.
- *Pravo na isplatu razlike neisplaćene plate* - Ako Vijeće u stegovnom postupku donese oslobađajuću odluku, danom njezine pravomoćnosti prestaje važiti odluka Vijeća o privremenom udaljenju. U tom slučaju ili ako je izrečena stegovna mjera novčane kazne ili ukora, zamjenik državnog odvjetnika ima pravo na isplatu razlike neisplaćene plaće za vrijeme trajanja posljedica odluke o udaljenju od obavljanja dužnosti.

Prema članu 99. Zakona o Državnoodvjetničkom vijeću svaka odluka kojom se odlučuje o privremenom udaljenju mora biti u pisanom obliku i obrazložena. Protiv odluke Vijeća kojom se odlučuje o privremenom udaljenju donesene u stegovnom postupku dopuštena je žalba, koja se podnosi u roku od osam dana. O žalbi odlučuje sudac pojedinac Vrhovnog suda Republike Hrvatske u roku od osam dana. Protiv ostalih odluka o privremenom udaljenju žalba nije dopuštena, ali se može pokrenuti upravni spor.

IV. Slovenija

U Sloveniji je privremeno udaljenje nosilaca pravosudnih funkcija uređeno Zakonom o sudskoj službi (suspenzija sudija) i Zakonom o državnom tužilaštvu (suspenzija tužilaca). Prvi zakon detaljnije uređuje ovo pitanje, a drugi zakon, pored ostalog, navodi da se zakonske odredbe koje se odnose na postupak suspenzije sudije i njegova prava u toku suspenzije, primjenjuju shodno i na državne tužioce.

Za vrijeme suspenzije sudija odnosno tužilac u Sloveniji prima naknadu plate koja je jednaka polovini plate koju bi dobio da radi. U slučaju kad je u pritvoru, sudija/tužilac ima pravo na naknadu u visini jedne polovine plate ako izdržava porodicu, a ako ne izdržava porodicu dobija samo jednu trećinu plate.

Suspenzija sudije

Suspenziju sudije uređuju Četvrti dio Poglavlja VII [Zakona o sudskoj službi](#) i odredbe člana 52. istog zakona: „Plata sudije (...) može se umanjiti na osnovu pravomoćne odluke disciplinskog suda, odluke Sudskog vijeća ili odluke nadležnog organa za vrijeme kad je sudija privremeno udaljen iz sudske službe ili je protiv njega određen pritvor.“

Pokretanje suspenzije uređuje član 95. ovog zakona.

- Ako je protiv sudije pokrenut krivični postupak zbog osnovane sumnje da je krivično djelo počinio zloupotrebom sudske funkcije, predsjednik Vrhovnog suda sudiji mora izreći privremeno udaljenje iz sudske službe (u daljnjem tekstu: suspenzija).
- Ako je protiv sudije pokrenut krivični postupak zbog krivičnog djela koje se goni po službenoj dužnosti i za koje je moguće izreći kaznu zatvora dužu od dvije godine zbog koje sudija može biti razriješen, predsjednik Vrhovnog suda može izreći suspenziju.
- Odluku o suspenziji predsjednika Vrhovnog suda iz sudske službe, u slučajevima iz prethodnog stava, donosi Sudsko vijeće.

Žalba na pokretanje suspenzije - Protiv odluke o suspenziji, koja mora biti obrazložena, sudija može uložiti žalbu Sudskom vijeću u roku od 15 dana od prijema odluke, a predsjednik Vrhovnog suda Državnom zboru, kako je definirano članom 96. ovog zakona.

Trajanje suspenzije - Članom 97. Zakona o sudskoj službi je propisano da suspenzija traje do donošenja konačne odluke nadležnog organa o razrješenju sudije. Ako se postupak pred krivičnim sudom okonča na takav način da nema osnova za razrješenje sudije prema ovom zakonu, suspenzija prestaje danom donošenja odluke kojom se prvostepeni postupak okončava, a ukida se danom pravomoćnosti te odluke, zajedno sa svim posljedicama.

Naknada plate za vrijeme suspenzije - Zakon je u članu 98. naveo da za vrijeme suspenzije sudija prima **naknadu plate koja je jednaka polovini plate** koju bi sudija dobio da radi.

Obavještanje nadležnih - Kad je za određivanje pritvora ili pokretanje krivičnog postupka protiv sudije potrebna dozvola Državnog zbora, nadležni sud obavještava Sudsko vijeće i ministarstvo nadležno za pravosuđe o tome da ja zatražio dozvolu. Državni zbor donosi odluku o dozvoli nakon što dobije mišljenje Sudskog vijeća, kako je navedeno u članu 99. ovog zakona. U članu 100. Zakona o sudskoj službi navedeno je da sud koji odredi pritvor sudiji o tome odmah mora obavijestiti predsjednika suda u kojem sudija obavlja sudske službu, Sudsko vijeće i ministarstvo nadležno za pravosuđe.

Naknada plate za vrijeme pritvora - **Sudija koji je u pritvoru ima pravo na naknadu jedne trećine plate, a ako izdržava porodicu – polovine plate.**

Suspenzija državnog tužioca

Suspenzija tužioca propisana je članovima od 93. do 95. [Zakona o državnom tužilaštvu](#). Međutim, prije navođenja zakonskih odredbi koje uređuju suspenziju, treba navesti i član 51. ovog zakona, prema kojem se plata državnog tužioca može umanjiti na osnovu pravomoćne odluke disciplinskog suda ili odluke nadležnog organa za vrijeme kad je državni tužilac privremeno udaljen iz sudske službe ili je protiv njega određen pritvor.

Pokretanje suspenzije u skladu s članom 93. Zakona o državnom tužilaštvu:

- Ako je protiv državnog tužioca pokrenut krivični postupak po službenoj dužnosti zbog krivičnog djela počinjenog zloupotrebom državnotužilačke funkcije, generalni državni tužilac mora državnom tužiocu izreći privremeno udaljenje iz tužilačke službe (u daljnjem tekstu: suspenzija).
- Ako je protiv državnog tužioca pokrenut krivični postupak zbog krivičnog djela koje se goni po službenoj dužnosti i za koje je moguće izreći kaznu zatvora dužu od dvije godine i zbog kojeg državni tužilac može biti razriješen, generalni državni tužilac može izreći suspenziju nakon prethodnog mišljenja Državnotužilačkog vijeća.

- Ako je protiv državnog tužioca oštećenik kao tužilac pokrenuo krivični postupak zbog krivičnog djela počinjenog zloupotrebom državnotužilačke funkcije ili zbog počinjenog drugog krivičnog djela za koje je moguće izreći kaznu zatvora dužu od dvije godine i zbog kojeg državni tužilac može biti razriješen, generalni državni tužilac može izreći suspenziju nakon prethodnog mišljenja Državnotužilačkog vijeća.
- O suspenziji **generalnog državnog tužioca** u slučajevima iz prethodnih stavova odluku donosi Vlada Republike Slovenije na osnovu obrazloženog prijedloga ministra, nakon prethodnog mišljenja Državnotužilačkog vijeća.
- Odluka o suspenziji mora biti obrazložena.
- Državno tužilaštvo odmah obavještava nadležne organe o pokretanju krivičnog postupka protiv državnog tužioca nakon donošenja *prethodno navedenih* odluka;
- Na postupak suspenzije i prava državnog tužioca u suspenziji shodno se primjenjuju odredbe zakona koji uređuje suspenziju sudija, ako ovim zakonom nije drukčije propisano.

Žalba na pokretanje suspenzije - Prema članu 94. ovog zakona, protiv odluke o suspenziji državni tužilac odnosno generalni državni tužilac može u roku od 15 dana od prijema odluke uložiti žalbu Državnotužilačkom vijeću. Žalba ne odlaže izvršenje odluke.

Državni tužilac odnosno generalni državni tužilac može usmeno obrazložiti razloge za žalbu na sjednici Državnotužilačkog vijeća.

Pritvor državnog tužioca - Državni tužilac ne smije biti pritvoren u krivičnom postupku koji je pokrenut protiv njega zbog sumnje na krivično djelo počinjeno obavljanjem državnotužilačke službe bez prethodne dozvole vijeća od tri sudije nadležnog višeg suda. Na prava državnog tužioca koji je pritvoren shodno se primjenjuju odredbe zakona koji uređuje prava sudija u pritvoru. (*Član 95. Zakona o državnom tužilaštvu*)

V. Srbija

U Srbiji je udaljenje sa sudijske funkcije propisano Zakonom o sudijama, a sa tužilačke - Zakonom o javnom tužilaštvu. Oba zakona definiraju razloge za udaljenje (obavezno i udaljenje koje nije obavezno), ko donosi odluku, trajanje udaljenja i pravo na prigovor. Međutim, važećim propisima u Srbiji nije propisano smanjenje plate nosilaca pravosudnih funkcija u vrijeme udaljenja sa sudijske odnosno tužilačke funkcije.

Sudija ili tužilac se udaljuje s funkcije u slučaju kad mu je određen pritvor, kad je pokrenut postupak za njegovo razrješenje ili krivični postupak za djelo zbog koga može biti razriješen.

Udaljenje sudije

Sudija se, prema članu 14. [Zakona o sudijama](#), udaljuje sa funkcije kad mu je određen pritvor. Osim toga, sudija može biti udaljen sa funkcije i kad je pokrenut postupak za njegovo razrješenje ili krivični postupak za djelo zbog koga može biti razriješen.

O obaveznom udaljenju sudije odlučuje predsjednik suda, a o obaveznom udaljenju predsjednika suda - predsjednik neposredno višeg suda. Ako udaljenje nije obavezno, o njemu odlučuje predsjednik Vrhovnog kasacionog suda. O udaljenju predsjednika Vrhovnog kasacionog suda odlučuje Opšta sjednica, precizirano je u članu 15. Zakona o sudijama.

U članu 16. ovog zakona navedeno je da se sudija udaljuje sa funkcije do ukidanja pritvora, okončanja postupka za razrješenje ili okončanja krivičnog postupka. Visoki savjet sudstva može sudiju vratiti na funkciju prije okončanja postupka za razrješenje.

Pravo na prigovor definirano je u članu 17. istog zakona. Na odluku o udaljenju sudija ima pravo prigovora Visokom savjetu sudstva, u roku od osam dana od dana dostavljanja odluke. Visoki savjet sudstva odlučuje o prigovoru u roku od osam dana od dana dostavljanja prigovora.

Udaljenje javnog tužioca/zamjenika tužioca

Javni tužilac i zamjenik javnog tužioca, kako je propisano članom 58. [Zakona o javnom tužilaštvu](#), udaljuju se sa funkcije kad im je određen pritvor. Oni mogu biti udaljeni sa funkcije kad je pokrenut postupak za njihovo razrješenje ili krivični postupak za djelo zbog koga mogu biti razriješeni.

Odlučivanje o udaljenju uređeno je članom 59. ovog zakona. Odluku o obaveznom udaljenju zamjenika javnog tužioca donosi javni tužilac, a o obaveznom udaljenju javnog tužioca neposredno viši javni tužilac. Ako udaljenje nije obavezno, odluku donosi republički javni tužilac. Odluku o **udaljenju republičkog javnog tužioca** donosi Državno vijeće tužilaca.

Protiv odluke republičkog javnog tužioca o udaljenju kada ono nije obavezno, javni tužilac, odnosno zamjenik javnog tužioca ima pravo prigovora Državnom vijeću tužilaca. Protiv odluke Državnog vijeća tužilaca o udaljenju kada ono nije bilo obavezno, republički javni tužilac ima pravo prigovora nadležnom odboru Narodne skupštine. Prigovor se podnosi u roku od tri dana, a nadležni organ donosi odluku po prigovoru u roku od 30 dana. Izjavljeni prigovor ne zadržava izvršenje odluke.

Kako je definirano članom 61. ovog zakona, udaljenje sa funkcije traje do ukidanja pritvora, pravosnažnog okončanja postupka za razrješenje ili pravosnažnog okončanja krivičnog postupka. Republički javni tužilac ili Državno vijeće tužilaca mogu ukinuti odluku o udaljenju prije okončanja postupka za razrješenje.

V. Izvori informacija

Galiot M., Čović S., Juras D. *Kaznena i stegovna (disciplinska) odgovornost sudaca*. Zbornik Pravnog fakulteta Sveučilišta u Rijeci, Vol. 34 No. 2, 2013. Portal hrvatskih znanstvenih i stručnih časopisa „Hrčak“ <https://hrcak.srce.hr/119394>

Internetska stranica Službenog lista Crne Gore
<http://www.sluzbenilist.me/>

Internetska stranica Narodnih novina Republike Hrvatske
<https://narodne-novine.nn.hr/search.aspx?upit=Zakon+o+Dr%c5%beavnom+sudbenom+vije%c4%87u&naslovi=da&sortiraj=1&kategorija=1&rpp=10&qtype=3&pretraga=da>

<https://narodne-novine.nn.hr/search.aspx?upit=Zakon+o+dr%c5%beavnom+odvjetni%c5%a1tvu&naslovi=da&sortiraj=1&kategorija=1&rpp=10&qtype=3&pretraga=da>

<https://narodne-novine.nn.hr/search.aspx?upit=Zakon+o+Dr%c5%beavnoodvjetni%c4%8dkom+vije%c4%87u&naslovi=da&sortiraj=1&kategorija=1&rpp=10&qtype=3&pretraga=da>

Internetska stranica Pravno-informacionog sistema Republike Slovenije

<http://www.pisrs.si/Pis.web/pregledPredpisa?id=ZAKO334>

Internetska stranica Pravno-informacionog sistema Republike Srbije

<https://www.pravno-informacioni-sistem.rs/SlGlasnikPortal/eli/rep/sgrs/skupstina/zakon/2008/116/2/reg>

<http://www.pravno-informacioni-sistem.rs/SlGlasnikPortal/eli/rep/sgrs/skupstina/zakon/2008/116/4/reg>